

1 Tesaronika

Jesus hã h'yy ka'eeh do panang Tesaronika häd näng doo bä habong do hã pooj jé Paw-Ro ma erih do hahÿÿh.

¹ ÿ Paw-Ro, Siras, Tsimoot daheeh, ãã edëng bëeh, Tesaronika panang bä habong doo, Jesus Kristo Tak'ëp Hyb N'aa Jawyk Do hã h'yy kata däk doo, P'op Hagä Do ër Yb hã h'yy kata däk doo. ãã karën P'op Hagä Do ër Yb, Jesus Kristo Tak'ëp Hyb N'aa Jawyk Do na-ããj hë ky en'yym bë hã. ãã karën baad bë rah'yyb en'yym.

Paw-Ro ratsebé Jesus hã rah'yy ka'eeh do hyb n'aa ky n'aa hahÿÿh

² P'op Hagä Do hã ãã ky n'aa etsëë bä, ãã tsebee had'yyt hë ta hã bë hyb n'aa. ³ P'op Hagä Do ër Yb hã ãã ky n'aa etsëë bä, ãã hyb n'aa es'ee had'yyt hë baad bë babok doo, Jesus hã bë h'yy ka'eeh do hyb n'aa. ãã hyb n'aa esee tak'ëp bë moo heb'ooh bä bë da hadoo do bë masa hyb n'aa, bë kamahãn do hyb n'aa sa hã. ãã hyb n'aa newëë na-ããj hë, baad nadoo do bë ahob né paawä, dooh né hë bë hyb n'aa eréd Jesus Kristo ër Wahë N'aa hã bë h'yy ka'eeh doo, p'aa hënh tabahyng bë bahapäh do hyb n'aa. Ti hyb n'aa P'op Hagä Do hã ãã tsebé. ⁴ ãã wakãän, P'op Hagä Do kamahãn doo, ãã hapäh, bë P'op Hagä Do asëëw hõm ta karapee bë bahadoo hyb n'aa. ⁵ ãã wén hapäh tii, Jesus ky n'aa hanäm do bë ãã maher'oot noo gó, ãã kyy me had'yyt nado ãã baher'oot. P'op Hagä Do Sahee hejój banoo ãã hã, ãã bahajaa hyb n'aa ãã her'oot doo. Se hub né hë Jesus ky n'aa baad ãã bahapäh ãã h'yyb gó. Bë bahapäh nyy da ãã babok bë mahang. Baad ãã babok do hã bë bahapäh te

hub né hē Jesus ky n'aa āã manaa doo. ⁶ Āã wén hapäh na-
 āāj hē bē P'op Hagä Do asēew hōm doo, āã babok doo da,
 Tak'öp Hyb N'aa Jawyk Do bawäd wät doo da bē baboo däg
 kän do hyb n'aa. P'op Hagä Do Sahee hana do ji tsebé doo
 me bē gado däk Jesus ky n'aa, ta wób bē rarahejä né paawä
 ta hyb n'aa. ⁷ Ti hyb n'aa, sahōnh hē Masedonija häd näng
 do häj n'aa bä, Akaja häd näng do häj n'aa bä habong do
 Jesus hä h'yy ka'eeh doo, rahapëë däk hÿÿ kä tak'öp P'op
 Hagä Do hä ji h'yy ka'eeh bē h'yy ka'eeh do hadoo. ⁸ Bē
 hanaa né hē Jesus ky n'aa Masedonija, Akaja häj n'aa bä
 raky n'aa napëë hōm doo. Jé pad'yyt hē raky n'aa napëë
 kän P'op Hagä Do hä bē h'yy ka'eeh doo. Ti hyb n'aa, dooh
 āã her'ood wäd bä bē ky n'aa, sahōnh hē raky n'aa napëë
 däk do hyb n'aa P'op Hagä Do hä bē h'yy ka'eeh doo. ⁹ Sa
 daaj hē rabaher'ood kän jé pad'yyt hē bē hä āã baher'ood
 wät doo, baad bē mahang āã babok doo. Raher'ood kän
 na-āāj hē, bē eréd hōm kabarii hä bē h'yy ka'eeh doo, P'op
 Hagä Do hä, hedöp do hä, heh'äät hä bē h'yy ka'eeh hyb
 n'aa kä. P'op Hagä Do karën do bē moo bok hÿÿ kä, ta hä
 bē hyb n'aa jew'yyk hÿÿ kä, sa nooh. ¹⁰ Raher'oot na-āāj
 hē ta T'aah, dejöp do mahang ganä wät do P'op Hagä Do
 an'oo bä, bē gada tamatëeh hÿÿ pong jé naa. Jesus bē gada,
 ji tamo n'aa jesuu doo, nesaa do hä ta hä h'yy kana'eeh do
 P'op Hagä Do ky n'aa ety mahänh.

2

*Baad Tesaronika panang bä Paw-Ro rababok do ky n'aa
 hahÿÿh*

¹ Bëeh, āã wakāän, bē hapäh ti dooh daap hē tado bä
 bē mahang āã her'oot do Jesus ky n'aa. Hajök ky dah'eeh.
² Pooj jé Pirip häd näng do panang bä āã rarejä né paawä,
 āã raky n'aa rejä né paawä, P'op Hagä Do er h'yy kaha'eeh
 doo, āã tah'yyb ne'ÿÿm. Ti hyb n'aa bē āã maher'oot ta

ky n'aa hanäm doo, hajõk bë panang buuj ãã rahyb n'aa wareem né paawä. ³ Sähõnh hë sa hä ãã ky padäg hë Jesus hä rah'yy ka'eeh hyb n'aa, dooh daap hë ãã menä bä. Ji es'õös do nado tii. J'ooj madäk do nado ti ãã wén her'oot P'op Hagä Do ky n'aa. ãã karën do jawén nado. Dooh bë ãã wad'ii bä. ⁴ ãã P'op Hagä Do metyy paah, ti ãã hä tah'yyb däng ta panyyg hanäm do ãã baher'oot hyb n'aa sahõnh hë sa hä. Ti hyb n'aa ta panyyg ãã baher'oot bä, dooh ta wób gen'aak do ky n'aa ãã her'ood bä. P'op Hagä Do gen'aak do ti ãã her'oot doo. Ti né hë ti ãã h'yyb metyy doo. ⁵ Dooh noo gó ãã h'yyb manep'ëeh péh. Bë hapäh né hë, dooh tii da ãã adoo bä. Dooh noo gó ãã ky ken'yym sa ma hyb n'aa, Jesus ky n'aa ãã baher'oot bä. ãã ehub né hë ãã her'oot do P'op Hagä Do hapäh. ⁶ Dooh ãã bë j'aa etsë do jawén ãã aboo bä. Dooh ãã ta wób raj'aa etsë do jawén ãã aboo bä.

⁷ Kristo mejüü do ãã bahadoo do hyb n'aa, ãã karën bä paawä, ãã haja né paawä bë hä ãã mejõ bä. Ti hadoo né hë, dooh tii d' ãã karën bä. Bë mahang ãã babok noo gó baad ãã ky enyym bë hä. Ji yÿn ji takamahän do hadoo, ⁸ bë ãã kamahän tak'ëp. Bë ãã panäk paa P'op Hagä Do panyyg hanäm doo. Baad ãã h'yyb bë ãã masa hyb n'aa. Tii da ãã wén d'oo tak'ëp ãã kamahän do hyb n'aa bëeh. ⁹ ãã wakään, bë hapäh nä tak'ëp ãã moo bok ãã ma, ãã waa sãm hä, bë mahang ãã habok noo gó. Adëb bä, atsëm ãã moo bok ãã waa sãm hä. Tii da ãã wén d'oo, bë hä ãã ganada hyb n'aa ãã waa, ãã h'ëed, P'op Hagä Do panyyg hanäm do ãã her'ood nuuj jé bë hä. ¹⁰ Bë hapäh, P'op Hagä Do hapäh na-ãäj hë hahÿyh: Baad ub né hë, P'op Hagä Do karën doo da ãã babok paa bë mahang, Jesus hä h'yy ka'eeh do mahang. Dooh hyb n'aa ãã hä raky kes'ëem péh. ¹¹⁻¹² Bë hapäh na-ãäj hë, bä mahang ãã babok noo gó bë ãã h'yyb enäw had'yyt hë, bë ãã mejüü tak'ëp péj sét ken'yyh, ji

yb ji hã tabad'oo do hadoo, P'op Hagä Do karën doo da bë babok hyb n'aa. Tii da ãã karën bë babok, bë P'op Hagä Do atsyyd wät do hyb n'aa tabag'ããs do karapee bë bahadoo hyb n'aa, ta sii, hÿ pong jé ta bag hetsooh do gabarëeh do mahang bë babok hyb n'aa.

¹³ P'op Hagä Do ky n'aa bë hã ãã baher'oot noo gó, ãã kyyh nado ti bë hã. P'op Hagä Do kyyh bë hã, bë wén ky daheeh. Te hub né hë tii. P'op Hagä Do kyyh né hë ti bë maa newëë doo, ãã her'oot doo. Ta kyy me né hë P'op Hagä Do bë tah'yyb h'ÿÿt, bëeh, ta hã h'yy kasadä doo. Ti hyb n'aa P'op Hagä Do hã ãã tsebee had'yyt hë.

¹⁴ ãã wakãän, Jesus ky n'aa bë ky daheeh ãã wén hapäh, Judah häj n'aa bä habong do Jesus hã h'yy ka'eeh do hado däk do hyb n'aa bëeh. Jesus hyb n'aa bë wakãän bë rarahejãã, sa hã sa wakãän rarahejãã do hadoo Jesus hyb n'aa. P'op Hagä Do karapee, Kristo Jesus hã h'yy ka'eeh doo, Judah häj n'aa bä habong do rahoop sa wakãän mooh, Jesus hã rah'yy ka'eeh do hyb n'aa. Ti hadoo né hÿÿ kä bë ahoop né hë bë wakãän Jesus hã h'yy kana'eeh do sa mooh, P'op Hagä Do panyyg bë ky daheeh do hyb n'aa.

¹⁵ Nanäng Judah buuj Jesus hã h'yy kana'eeh do kyy gó né hë radaj'ëep Jesus, Tak'ëp Hyb N'aa Jawyk Doo. Tii d' né paa sa wahë makū rabad'oo P'op Hagä Do ky n'aa rod wób sa hã. Radej'ëep né paah. Tii d' né hë ãã hã hÿÿ kä. ãã kejën bong ran'oo bä hajöng panang bä. Dooh P'op Hagä Do gen'aak do ramoo boo bä. Sahõnh hë badäk hahÿÿ hã habong do majiï däg. ¹⁶ Judah buuj nadoo do hã P'op Hagä Do panyyg hanäm do ãã baher'oot bä, P'op Hagä Do bed'ëep hyb n'aa sa h'yyb tym, ta wë rababok hyb n'aa, ãã rameduuk Judah buuj Jesus hã h'yy kana'eeh do hã. Tii d' had'yyt rawén d'oo do hyb n'aa ta bahãnh däg sa hã hanäng do nesaa doo. Ti hyb n'aa edaa däk ta säm baj sa hã P'op Hagä Do banoo doo.

Tak'ëp Paw-Ro rakarën rabaheg'ããs Tesaronika buuj ky n'aa hahÿÿh

¹⁷ ãã wakãän, banadawëd ãã bah'üüm ran'oo bä bë mahãnh, tak'ëp ãã h'yy ketón bong, ji t'aah dajëp do ji h'yy katón do hyb n'aa hadoo. Dooch né paawä bë mahang ãã aboo boo bä, bë ãã hyb n'aa esee. Tak'ëp ãã karën bë ãã baheg'ããs. ¹⁸ ãã h'yyb gó ãã karën paawä bë ãã bahehëen. Hajõõ nuu me hëp ÿÿ ÿ karën paawä ÿ bahõm bë wë. ãã wén nahõm, Nesaa Do Yb ãã tah'yyb panas'ëëh do hyb n'aa. ¹⁹ Tak'ëp ãã wén karën bë ãã baheg'ããs, bë hyb n'aa né hë ãã j'aa etsë, bë hyb n'aa né hë ãã tsebë. Baad P'op Hagä Do hä bë h'yy ka'eeh nä Jesus matëeh noo gó ãã gahëen. Baad had'yyt hë Jesus hä bë h'yy ka'eeh do hyb n'aa ãã tsebë da, ãã j'aa etsë da Jesus Kristo, ër wahë n'aa, p'aa hënh tabahyng noo gó ji mo haj'aa tabaheg'ããs bä. ²⁰ Te hub né hë, bë hyb n'aa né hë ãã kasab'ee, bë hyb n'aa né hë ãã tsebë. Ti hyb n'aa ãã karën bë ãã baheg'ããs.

3

¹⁻² Ti hyb n'aa, tak'ëp ãã h'yy katón bä bë hyb n'aa, ãã hyb n'aa newëë Tsimoot ãã mejüü bë wë. Ti nuuj jé Atën häd näng do panang bä ÿ baym Siras daheeh. ãã hÿÿj hadoo né hë ti Tsimoot. ãã hadoo né tii, P'op Hagä Do karën do moo wät doo. Kristo ky n'aa tahe'oot. ãã mejõ hõm bë tah'yyb tsebë hyb n'aa, baad had'yyt hë Jesus hä bë h'yy ka'eeh hyb n'aa, ³ bë h'yy ganejë hõm hyb n'aa, baad nadoo do bë ahoop do hyb n'aa. Bë hapäh né hë, Jesus Kristo hä ji h'yy kae bä, ji rarahejãã. Ti né hë P'op Hagä Do h'yyb däng ji hä, baad ji h'yyb tawapëen hyb n'aa. ⁴ Bë mahang ãã babok noo gó, hajõõ nuu me bë ãã maher'oot ji da rarejãã Jesus hä ji h'yy ka'eeh do hyb n'aa. ãã her'oot do paa ta ti bë hä, ta ti né kä. ⁵ Bë h'yy gejë hõm ÿ ed'oo bë rarahejãã do hyb n'aa. Nejaa wäd hëp ÿÿ

ÿ gamada me bë ky n'aa. Ti hyb n'aa ÿ mejüü Tsimoote bë wë, bë taheg'ãäs Jesus hä bë h'yy kae nä bä. ÿ h'yyb eÿÿm Nesaa Do Yb, ji h'yyb tahet'uuk doo, bë tah'yyb tatug bä bë hyb n'aa eréd hõm bä Jesus. ÿ h'yyb eÿÿm Satanas bë tah'yyb met'ëëg hõm bä. Daap paawä tii bä äã ma met'ëëg bong Jesus ky n'aa bë hä.

⁶ Hÿÿ kä, nag'aap hë Tsimoote kaja nä bë wë hana doo. Baad bë ky n'aa tabaheer'oot. Baad Jesus hä bë h'yy ka'eeh tanooh, baad ta wób bë kamahän tanooh. Bë hyb n'aa es'ee had'yyt hë m' ääh, tanooh. Tak'ëp mä bë karën bë wë äã baheg'ãäs, tanooh. Tii d' né äã karën né hë. ⁷ Ti hyb n'aa, äã wakään, tak'ëp äã rarahejä né paawä äã tseebe kån bë ky n'aa hanäm do hyb n'aa. Jesus hä bë h'yy ka'eeh nä do hyb n'aa äã wén tseebé. ⁸ Hÿÿ kä dooh äã h'yy ketón boo bä. Äã tseebe'ee hÿÿ kä, baad Jesus hä bë h'yy kae had'yyt do hyb n'aa. ⁹ “Taw'ääts hë õm ee. Baad mah'yyb mahüüm sa h'yyb tym. Äã mah'yyb tym tseebe'ee sa hyb n'aa”, näk äã P'op Hagä Do hä. Tak'ëp P'op Hagä Do äã j'aa etsë bë hyb n'aa. ¹⁰ Hajõõ nuu me tak'ëp P'op Hagä Do hä äã betsëe, p'aa hënh bë äã baheg'ãäs tan'oo bä, bë äã ma metëëk hyb n'aa bë nahapäh nä doo, baad had'yyt hë Jesus hä bë h'yy ka'eeh hyb n'aa kä.

¹¹ P'op Hagä Do ër Yb hä, Jesus ër Wahë N'aa hä na-äãj hë äã ky n'aa etsëe, rabado hõm hyb n'aa sahõnh hë äã tahewaat doo, tabahajaa hyb n'aa bë wë äã bah'üüm. ¹² Tak'ëp Hyb N'aa Jawyk Do hä äã ky n'aa etsëe, sahõnh hë bë da hadoo do tak'ëp bë kamahän magyys hë hyb n'aa, tak'ëp bë äã kamahän doo da. ¹³ Äã ky n'aa etsëe bë h'yyb tym tabehej'oonh hyb n'aa, ta karapee sii hë Jesus ër Wahë N'aa kajaa bä kä, ji naw'yyt hyb n'aa bë hä raky n'aa tapaa do ky n'aa P'op Hagä Do ër Yb matym gó, baad ub, tsyt hë ta wë bë babok do hyb n'aa.

4

P'op Hagä Do karën doo da ji bawäd had'yyt hē do ky n'aa hahÿÿh

¹ Hÿÿ kä äã wakãän, ta see ky n'aa bë hä äã ma erih. Jesus kyy gó tak'ëp äã betsëë paa bë hä, P'op Hagä Do karën doo da bë baboo had'yyt hē, bë äã ma metëëk do paa hadoo da. Tii d' né hē bë babok äã hapäh. Hÿÿ kä, ta bahãnh äã karën bë an'oo bä. ² Tii d' ÿ wén etsëë bë hä, bë hapäh do hyb n'aa Jesus ky gabuuj gó bë hä äã mejüü do paah.

³ P'op Hagä Do karën sahõnh hē baad nadoo do bë eréd hõm, baad hadoo do bë gadoo, baad had'yyt hē bë babok hyb n'aa kä. Dooh P'op Hagä Do karën bä bë äã bä bë ÿÿm, bë patug nadoo do sii. ⁴ Takarën bë sahõnh hē bë h'yy keb'aah bë ÿÿm nadoo do hä, bë patug nadoo do hä. P'op Hagä Do karën baad ub, tsyt hē, ta wë bë baboo had'yyt hē, P'op Hagä Do hä, ta wób hä na-ãäj hē weh'ëeh doo da. ⁵ P'op Hagä Do sa h'yyb gó nahapäh do bë hado manäh. Nesaa do sa h'yyb tii. Rah'yy karën pé sii rabahe'ÿÿh. ⁶ Dooh ta tii da ji wad'ii ji da hadoo doo. Ta da hadoo wadii péh, ta da hadoo do ÿÿm sii haÿÿh péh, Tak'ëp Hyb N'aa Jawyk Do rajãã da, baad äã maher'oot do paa né hē bë hä. ⁷ Ër P'op Hagä Do atsyyd wät, baad had'yyt hē ër babok hyb n'aa ta wë. Dooh ër tatsyyd bä nesaa doo gó ër babok hyb n'aa. ⁸ Ti hyb n'aa jé hahÿÿ äã ma metëëk do taky nadahé bä, aj'yy kyyh had'yyt hē nado taky nadaheeh, P'op Hagä Do kyyh ti taky nadaheeh doo! P'op Hagä Doo, ta Sahee baad had'op do bë hä hanoo do ti taky nadaheeh!

⁹ Dooh hyb n'aa bë äã ma erih pé ji da hadoo do ji kamahãn do ky n'aa, P'op Hagä Do ma met'ëëg wät do hyb n'aa bëeh, bë kamahãn hyb n'aa bë da hadoo doo. ¹⁰ Äã hapäh, sahõnh hē Jesus hä h'yy ka'eeh do Masedonija häj

n'aa bä habong do bë kamahñn. Ti hado né paawä, ãã wakãän, tak'ëp ãã betsëë bë hä ta bahñnh bë kamahñn hyb n'aa bë da hadoo doo. ¹¹ Ta ãñ hä had'yyt hë bë hyb n'aa newë nyy da bë bad'oo, tak'ëp baad ub bë babok hyb n'aa bë da hadoo do wë, bë du nen'aa hyb n'aa bë tah. Taw'ãäts hë bë ma hä bë moo bok, bë waa enäh hyb n'aa, bë h'ëed enäh hyb n'aa, bë ãã ma metëek do paa da né hë ãã habok noo gó bë mahang. Taw'ãäts hë ta tii hä bë h'yyb padäg had'yyt hë. ¹² Tii da bë ãã wén mejũũ, ta ãñ hä had'yyt hë baad bë babok Jesus hä h'yy kana'eeh do rahegãã bä kä, baad bë raweh'ëeh hyb n'aa, ta wób hä bë daab yb mahñnh n'aa na-ãäj hë.

Jesus matëeh do ky n'aa hahỹyh

¹³ ãã wakãän, ãã karën baad bë bahapäh Jesus hä h'yy ka'eeh do dejëp do sa ky n'aa. Dooch ãã karën bë h'yy ketón bä dejëp do hä, ta wób, Jesus hä h'yy kana'eeh do rah'yy katón doo da. Tak'ëp rawén h'yy ketón tii, rapanyyg kanadaheeh do hyb n'aa ji ganä wät do ky n'aa. Ji dajëp jawén paa bä, dooh baad hadoo do ragahëen péh. ¹⁴ Jesus dajëp, tii bä taganä wät p'aa hënh ãã hapäh. Ti hyb n'aa ër hapäh hahỹyh: Jesus hä h'yy ka'eeh do paa dejëp doo, genä bong da p'aa hënh sa kamag paa P'op Hagä Do an'oo bä. Hỹ pong jé Jesus masäk ta sii P'op Hagä Do an'oo bä. ¹⁵ Bë ãã maher'oot Jesus, Tak'ëp Hyb N'aa Jawyk Do ãã tama metëek doo: Ëër, babä hedëp nä do Jesus p'aa hënh tamatëeh bä, dooh da ër mamuun ta hä, ta hä h'yy ka'eeh do dejëp do sa pooj jé. ¹⁶ Ta daaj hë Tak'ëp Hyb N'aa Jawyk Do bahyng da wawëë hë hỹ pong jé naa. Ti noo gó da ji maa napäh da ta hejój Jesus mejũũ doo. Tak'ëp da ta kyyh. Ti noo gó né da ji maa napäh ãäs sa wahë n'aa kyyh. Ti noo gó né da torõm-bet häd näng doo, P'op Hagä Do ma, gamehỹyh do ji maa napäh da. Tii bä kä, Kristo hä h'yy

ka'eeh do dejëp do paa kä genä hõm kån sa kamag paah.
¹⁷ Tii bä nadejëp nä doo, as'ëëg kån sa sii wë puh mahang
 P'op Hagä Do an'oo bä, wë hä, Jesus ër wahë n'aa, ër gadoo
 hyb n'aa. Tii bä kä, hÿ pong jé ta sii had'yyt ër baboo kån.
¹⁸ Ti hyb n'aa bë da hadoo do hä bë h'yyb tsebee ji ganä
 wät do ky n'aa hä.

5

¹ Dooh hyb n'aa ny noo gó Jesus bahyng do ky n'aa äã
 berih péh, äã wakään. ² Baad bë bahapëë däk ta ti ky n'aa.
 Bë hapäh, nayyw hë da Jesus kajaa. Ji ganada bä takajaa.
 Hets'ëëk do atsëm kajaa do ji ganada do hadoo tii. ³ Ta
 wób, Jesus hä h'yy kana'eeh do rah'yy kanap'eed gó raky
 hadoo bä: “Taw'ääts hë, h'yyb nyw däk badäk hahÿ hä
 habong doo. Dooh ër heÿÿm péh”, rabanäng bä, tii bä kä
 da, nayyw hë P'op Hagä Do mo haj'aa adäng sa hä tak'ëp
 nesaa doo. Nayyw hë da tii. ÿÿnh wog mahÿÿnh nayyw
 hë ganä däk do hadoo da. Nayyw hë da P'op Hagä Do mo
 haj'aa adäng sa hä tak'ëp nesaa doo. Dooh da rahaja bä
 rakejën bä ta ti mahãnh.

⁴ Jesus hä h'yy kana'eeh doo, badagyp do hadoo doo
 gó habok doo, Jesus kajaa do ganah'ëën do nahado bëëh.
 Ti hyb n'aa dooh bë h'yy gabadoo bä Jesus kajaa do hä,
 hets'ëëk do hä ji h'yy gabadoh do hadoo. ⁵ Ta bag hadoo
 doo gó habok do bëëh, P'op Hagä Do panyyg hanäm do
 hä bë h'yy kadaw'uuh do hyb n'aa. Ti hyb n'aa dooh
 bë h'yy gabadoo bä Jesus kajaa bä. Atsëm habong doo,
 P'op Hagä Do panyyg hanäm do hä h'yy kanadew'uuh do
 hyb n'aa badagyp do hadoo doo gó habong do nahado
 ëër. ⁶ Ti hyb n'aa taw'ääts hë dooh ji h'yy kanap'eed
 bä Jesus kajaa do hä ta wób rabad'oo doo da. A'ÿÿh do
 hadoo tii. Taw'ääts hë ër hyb n'aa matakëë. Taw'ääts
 hë ër h'yyb ër mesoo, baad nadoo do ji h'yyb karën do

jawén ér nabok hyb n'aa. ⁷ Ha'ỹȳh doo, atsëm ti rabaỹȳh. Jarakë hedoo do he'ëek doo, atsëm ti rakanahapëë bong ta mahỹȳj hyb n'aa. Atsëm buuj hadoo né tii, badagyp do hadoo doo gó habok doo. ⁸ Èër, dooh tii da ér hado bä. Adëb bä buuj hadoo èër, baad hadoo do P'op Hagä Do karën do hapäh doo. Ti hyb n'aa, taw'ääts hë ér h'yib ér mesoo, baad nadoo do ji h'yib karën do jawén ér nabok hyb n'aa. Taw'ääts hë baad ér kan'yyh, sa h'yy gatsapoog me, sa nu gasu me na-ääj hë warahén rakan'yyh doo da hadoo. Hahỹy d' ỹ hanäng pé tii: Taw'ääts hë baad ér h'yy kae had'yyt hë P'op Hagä Do hä. Taw'ääts hë ta wób ér kamahñn had'yyt hë. Taw'ääts hë Jesus ér ted'ëep sahõnh hë P'op Hagä Do rejää do mahñnh ér gahëen had'yyt hë.*

⁹ Ta ti ỹ wén her'oot, ér P'op Hagä Do asëew hõm ér tarejää hyb n'aa nado. Èr tasëew hõm ér tabed'ëep hyb n'aa ta wób tarejää noo gó, ér hyb n'aa Jesus Kristo ér Wahë N'aa, dajëp do hyb n'aa. ¹⁰ Èr hyb n'aa Jesus wén dajëp, ta sii ér babok hyb n'aa. Jesus matëeh bä ér edëb nä bä, ér dejëb bä na-ääj hë, ta sii né da ér babok. ¹¹ Ti hyb n'aa, P'op Hagä Do ér ted'ëep do hyb n'aa, bë da hadoo do hä bë h'yib tsebee. Bë da hadoo do hä bë h'yib masaa. Tii da bë bad'oo doo da né hỹy kä.

¹² Äã wakään, tak'ëp äã betsëe bë hä, bë wehëe bë mahang tak'ëp moo bok doo, bë da h'yib hadoo do Jesus hä h'yy ka'eeh do bë ma met'ëek doo, bë h'yib mah'üüm doo. ¹³ Bë wehëe, bë kamahñn, tak'ëp ramoo bok do hyb n'aa bë ramasa hyb n'aa. H'yib näm doo gó bë aboo bë da hadoo do wë.

¹⁴ Äã wakään, tak'ëp äã betsëe bë hä, tak'ëp peej bë maher'ood Jesus hä h'yy ka'eeh do moo nehõnh do ramoo bok hyb n'aa sa ma sãm hä, sa waa sãm hä. Bë h'yib tsebee

* 5:8 Tii d' ji adoo bä, dooh da nesaa do ji moo wäd bä.

jé h'yyb nahed'oo doo. Bë masaa kanahën doo nä Jesus hä h'yy ka'eeh doo. Bë hyb n'aa ejãg manäh bë da hadoo do hä. ¹⁵ Bë abaa j manä nesaa do bë wë moo wät do hä. Taw'ääts hë bë ky enyym bë da hadoo wë, ta wób, Jesus hä h'yy kana'eeh do sa wë na-ããj né hë.

¹⁶ Taw'ääts hë bë h'yyb tsebee had'yyt hë. ¹⁷ Taw'ääts hë bë ky n'aa ets'ëë had'yyt hë. ¹⁸ Taw'ääts hë P'op Hagä Do wë bë tsebee had'yyt hë, baad tabadoo bä bë hä, baad tanado bä bë hä na-ããj hë. Tii d' né hë P'op Hagä Do karën bë hä, Kristo Jesus karapee, Jesus ky dah'eeh do bë bahadoo do hyb n'aa.

¹⁹ Bë medug manä P'op Hagä Do Sahee. ²⁰ Bë ty n'aa gesygg manä bë ramaher'oot doo, P'op Hagä Do Sahee metëeh do rahanäng doo. ²¹ Ti hadoo né hë, bë mety sahõnh hë raher'oot doo, P'op Hagä Do Sahee hanaa né hë tado bä bë bahapäh hyb n'aa. Tii bä bë gadoo te hub hadoo doo. ²² Taw'ääts hë nadoo doo, P'op Hagä Do kyy kerih do hä baad kanejäk doo, bë gado manäh. P'op Hagä Do Sahee kyy gó nado tii bä.

²³ P'op Hagä Do hä, ta karapee tah'yyb n'yym doo, ÿ ky n'aa etsëë tsyt hë baad had'yyt hë, takarën doo da bë babok tan'oo bä. ÿ ky n'aa etsëë, tabanoo hyb n'aa bëeh, bë h'yyb tym sii hë, baad tabahadoo hyb n'aa Jesus Kristo ër Wahë N'aa matëeh bä kä, ji naw'yyt hyb n'aa bë hä raky n'aa tapaa do ky n'aa. ²⁴ P'op Hagä Do bë tanaëenh doo, dooh tah'yy gajëë hõm bä ji hä. Tahajaa né hë ta hä ji h'yy kasadëë bä. Ti hyb n'aa ÿ hapäh baad ub, tamoo wät né hë ta hä ÿ etsëë doo.

Paw-Ro rakedëë bong do ky n'aa hahÿÿh

²⁵ Äã wakään hedoo doo, bë ky n'aa ets'ëë P'op Hagä Do hä äãh. ²⁶ Äã karën baad bë edëë äã kyy gó sahõnh hë Jesus hä h'yy ka'eeh doo. ²⁷ Jesus ky gabuuj gó ÿ betsëë bë hä,

1 Tesaronika 5:28

12

1 Tesaronika 5:28

bë ner'oot hyb n'aa hahỹ ãã ma erih do sahõnh hẽ Jesus
hã h'yy ka'eeh do sa hã. ²⁸ Tagadëög ub ãã karẽn, Jesus
Kristo, ẽr Wahẽ N'aa ky enyym bë hã. Jããm hẽ kã.

Pop Hagä Do Panyyg Hanäm Do Hahÿÿh
 The New Testament in the Nadëb language of Brazil (BR:mbj:Nadëb)
 O Novo Testamento na língua Nadëb do Brasil
 copyright © 2011 Wycliffe Bible Translators, Inc.

Language: Nadëb (Nadëb)

Translation by: Wycliffe Bible Translators

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Nadëb

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-29

PDF generated using Haiola and XeLaTeX on 13 Mar 2019 from source files dated 12 Mar 2019

c5681c4e-55f8-5b64-badf-af07c5e28afc